



Schwoweblatt Nr. 28

zammgestellt vun **Helen Alba**
300488 Timisoara, Calea Sagului 21, sc. B, ap. 43
Telefon: 0256-245590
E-Mail: albah@web.de
www.lenauheim.de



Fronleichnam ufm Dorf / Vun der Bäsl Eva Mayer

Was war des doch immer for a grosses Fescht ufm Dorf! Die Musikante han ihre Inschtrumente geputzt, dass se nor so geglanzt han, wann die Sunn druf gscheint hot, do hots nor so gfunkelt. Mer hot sich direkt drin spiegle kenne. Un es is geprobt wore, dass aach alles klappt. Am Tach derfor han die Männer schun die Latte un Bretter beigetraa for die Kapelle ufstelle, weil jo an jeder Eck, wu so a Kapell ufgstellt is wor, des wor an vier Ecke vum Dorf, do hot doch a jeder wolle, dass sei Kapell die scheenschti sein soll. Die Jugend is in de Wald gang um Eichenäscht beizubringe for ufputze, die Nachberschweiwer han ihre Blumegärtche geplinnert, dass alles recht scheen sein soll. Die scheenschti Tischtiecher han se zum Vorschein ghol, es is a scheener Altar ufgstellt wor un noh wars soweit. Die Männer, die im Kercherat ware, die han de Baldachin traan derfe, die Buwe han die Fahne getraa, die Gasse ware so sauwer wie schunsch nor an der Kerwei. Die Maria-Mädche ware ganz in weiss mit Kränz ufm Kopp, mit ihre steife Reck sein se so stolz dorch die Dorfgass gang, han se doch gewisst, dass die Mottre un Omas schau ne zu, ob se aach scheen genuch sein. Vor der Kerch is nochmols a Muschterung gmacht wor, ob a jedi Falt im Rock richtich sitzt, ob sich nix verschob hot.. Die grosssi Mädle mit dem Gebetbuch, a Sacktiechl un a Blum in der Hand, die han kaum de Kopp gedreht, weil se jo an dem Tach de Zopp annerscht gflocht han ghat. Un dass der Kambl sich jo net verschiebt. Ich maan, heit kann gar niemand so a Zopp flechte, des war a wahri Kunscht! Die grosse Buwe, die han schun vor der Krech gstan, han die Mädle bewunnert, han kunschtatiert, welles Mädle des scheenschti is. Phaar Weiwer han aa do gstan un gschaut, hans Stalliere net losse kenne, weil immer ware solchi, die gern die Meiler uferiss han. Un wanns dann zammgeleit hot, is alles in die Kerch rein. De Pharre hot a Predich ghal, die er net abgeles hot, awer die zu Herze gang is. No der Mess hat sich die Prozession ufgstellt, sie sein vun aner Kapell zur anri gang. Die Musich hot gspielt, es war so ruhich, die Leit sein mit grosser Andacht gang. Do hot so mancher uf alli Feindselichkeit vergess un sich allerhand Gutes vorghol. Wann die Andacht in jeder Kapell rum war hot sich a jeder a Streisl mitghol, weils jo geweiht wor. Des han se dann derhem uf de Schubladkaschte gstellt. Ja, wu sein die Zeite? Des Fronleichnamsfescht get jo uf unser Banater Derfer schun lang nimi in dere Art abghal. Un des, weil jo unser Schwoweleit des Fernweh gepackt hot. For uns bleibt die Erinnerung an geweseni Zeite, die in Vergessenheit gerode, wann mer se net for die Nohwelt ufschreibe. Schun heit kann sich so mancher Jungi des net mehr vorstelle, wie scheen so a Fronleichnam-Prozession sein kann. Ja, die Welt ännert sich immer wieder, was jo verständlich is. Mir gehn aner, for mich unverständliche moderner Welt entgeije. Was wohl noch uf uns wart!?

Traurich is nor des, dass so mancher Mensch vergesst, dass es noch a Herrgott get, dem die Mensche vertraue sellte. Gut nor, dass doch noch so mancher Jugendlicher sich zum Glaawe bekennt!

Vum fettiche Hingspaprikasch / Vun der Bäsl Marianne Barak aus Berlin

De Matz un sei Weib han erscht vor schun längerer Zeit ihre Heimat verloss un sin zu ihre Kinner uf Deitschland ausgewannert. Dort war alles annerscht wie in ihrem kleene Darf derhem. Es war net leicht, bis se sich an die Großstadt gewehnt han. "Am Nohmittach gehn ich zu de Kinner", saat de Matz an eem scheene Tach zu seim Weib. Er hat gut zumittach gess, Hingspaprikasch mit Kneedle. Gut fettich, weil so hat's dem Mann am beschte gschmeckt. Dernoh hat er sich mit eem Bus uf de Wech gemacht. Wie de Matz e Weil im Bus sitzt, gspielt er, wie sei Därm rumore un es is em heiß un kalt gen. Was mach ich jetz nar, denkt er. Schand hin, Schand her, er froot, wu do e Klosett is. Jemand weist em iwer der Gass e scheenes, rundes Heisl, e effentliches WC. De Matz rennt je hin un sucht verzweifelt die Tierschlang. Do geht e unsichtbari, automatische Tier uf un e Mann kummt grad raus. Schnell geht de Matz nin un sitzt sich erleichtert hin. Weil er derhem bei dere Gelegenheit immer die Zeitung lest, holt er se aach desmol ausm Sack un vertieft sich in die Nachrichte. Uf eemol geht die Tier uf un alle Leit vun drauß schau un lache. De Matz war so verschrock, dass er net gewisst hat, was er jetzer mache soll?! Do is'm e Mann zu Hilf kumm un hat vun ausewenzich e Geldstick in e Schlitz geworf un die Tier is nochmol zugang. De Matz hat jo net gewisst, dass mer erscht des Geld ninwerfe muss, un

noh erscht ningehn derf. Mit so em Automat kann em des passiere! De Matz hat sich vorgholl, niemehr ausm Haus zu gehn, wann er fettiches Paprikasch gess hat!

Es Leibgericht

De Vetter Pheder war vun jeher zwar e aarich gräßlicher, awer niemols e anspruchsvoller oder schnausicher Mann, wann's ums Esse gang is. Er hat fescht ingepackt, immer e gute Apetit an de Tach geleet. Wann er in die Kich ninkumm is, hat er zwar gschnuppert un ausgeruft: "Des schmeckt awer fein heit!", doch wann er noh am Mittachstisch ghuckt hat, war's em eigentlich egal, was es Kathi em vorgsetzt hat, die Hauptsach, der Teller hat zwaamol mit Supp angfillt gin misse, un de zweite Gang, des hat aach immer e Mordsporzion sin selle. Oftmols hat des Kathi gsaat: Pheder, heit muss ich wieder die Leeder an dem Teller ansetze!" Bis uf eemol. De Pheder is wie alli Leit natierlich aach immer älter un nit jünger gin. Ufmol hats anfang zu zwicke un zu petze. De Maa hat wehgetun, die Lewer is angschwoll un die Gall hat gspautzt. "Gsiehscht", saats Kathi, "wann mer nie mit Moß hat esse kenne. Des macht sich jetz alles bemerkbar. Des fettichi un zu reichhaltichi Esse. Bleibt nix anres iwrich Pheder, du muscht Analiesn mache!" Schweren Herzens hat sich de Pheder zum Dokter ufgemacht. Un der hat kunschtatiert, dass die doppelte Porzione ufheere misse, dass nor noch mit Eel un ohne Inbrenn gekocht gin derf, dass de Pheder sich meh ans Grienfutter halle soll.... Des war for de starke Mann e aariche Stoß. Sei Lewe is vun nun an ganz annerscht verloff. Er hat umdisponiere misse, es Schweinefleisch is quasi abkumm, Speck un Schungefleisch nix tralla un jede Tach im Summer hats Kathi ihm e großi Salatschissl mit geriewene Gelriewe vorgsetzt. De Pheder hat lamentiert: "Kathi, ich sin hungrich! Koch mer doch endlich mol wieder mei Leibspeis!" "Ja Pheder, du hascht doch immer alles geere gess. Was is dann dei Leibspeis?"

"Ich han Gusta uf Faschiertes!" Weils Kathi gewisst hat, dass er nit vill Fleisch esse soll, hats em e Grienfutter-Faschiertes gemacht: geriebni Kerbs, gekochti Krumbiere, phaar Aijer un Mehl vermisch, alles gut gewerzt und mit Piree dem Pheder vorgsetzt. Der hat kräftich inghau un wie er satt war, ment er: "Kathi, so gutes Faschiertes hascht noch nie gemacht. War des mit Rinds- oder Schweinefleisch?" "Pheder, do war alles gemischt drin, die Hauptsach awer, es hat der gschmeckt!"

Herz was verlangscht.... Maul kriescht nix!

Ich war schun immer e kuraschierter Mensch. Es hat Zeite gin, des war noch selmols, wie ich in dere Elektromor-Fabrik gearweit han, do sin ich nachts leenich zu Fuß, vum große Bahnhof bis in die Schager Stroß, hemgang, weil mer doch selmols gearweit han, wies gfall is. Wanns geger Monatsend gang is, war die Arweit massahaft. Mir sin um vier Uhr nohmittachs hemgang, han gekocht, gewäscht un die Kiner schlofe geleet, dernoh sin mer je zuruck, weil mer nachts han misse unser Norm erfill. Un noh is des meischt so gewenn, dass mer geger drei Uhr nachts nix me ghat han zu arweite. Manchi han dann ihre Dummheite dorte gemacht (Witze verzählt, Gsellschaftsspieler gspillt oder sich ganz eenfach gegenseitich hopp ghol), ich hans awer vorgezoh, mich uf Schusters Rappe zu mache un mich noch zwaa Stund ufs Ohr zu leje. Kurasch han ich aach ghat, wie ich vor villi Johre umgsattelt sin. Ich han Elektromotor e gute Mann sin geloßt un sin zu dere Banater Zeitung kumm. In der erscht Zeit han ich owacht gin misse, dass ich alles kapiert un mich bei dere Schreiwerei nit blamiere tun. Un noder sin ich so in de Schurnalismus ningerot, dass es heitzutach awer nor me zum Schwoweblatt raicht. Un zwischedorch han ich selmols wie aach heit mei Wohnung uf Hochglanz gebrung. Des war vor Johre nit so eenfach. Wann ich es Finschter han wille ufmache, sin mer lauter Staabwolke entgeje gfloo. Un ich han die Kurasch verlort. Weil dort newer uns, dort war eemol die "Arta Textila". Dann war e Zeit, wu dorte nor e Schutthaufe war. Sie han im e Winter alles abgeriss. Des war e Zirkus, ständich hats gebumbert, alles war voller Dreck. Doch es gsaat gin, sie baue dorte jetz so e Profi-Gschäft, e Kaufland wie in Deitschland. Also, wann des fertich is, han ich mer domols gedenkt, sin ich alli Sorche los. Do brauch ich nor ausm Block raus un ins Gschäft nin. Un schun han ich Herz was verlangscht - Maul kriescht nix - wann ich ke Kreizer im Sack han. Un heit, wann ich alles griffbereit uner em Finschter han, geh ich nor ganz selten in des Profi-Gschäft. Un des weil.... Ich mol aarich drufgezahlt han. Des war so: ich sin erscht um Brot un in die Fleischbank gang, han e guts Schipppl Geld ausgin un sin mit meim Zecker ins Profi. Dorte han ich ne uf dem Abstell-Stellasch gelosst un han weiter inkaaft, was mer halt so im Haushalt brauche tut. Schun bei der Kassa ankumm, han ich mit meim Zecker liebäugle wille, weil mer jo nie weeß.... Ja, un ich han mei Zecker nit gsiehn. Um Gottswille, denk ich! Han mei ganzes Geld ausgin, es werd mer doch kenner mei Zecker gstohl han! Un es war wirklich so. Nix hat gholf. Ke Glure noh meim Fleisch, ke Lammentiere, ke Krach schlaan!